

摘藻堂四庫全書薈要

集部

欽定四庫全書薈要

集部

誠齋集卷三十四

詳校官助教臣謝登雋



欽定四庫全書薈要卷一萬五千六百十一

集部

誠齋集卷三十四

宋 楊萬里 撰

詩

江東集

與次公幼輿二子登伏龜樓

周遭故國是山園對境方知此句奇偶上伏龜樓上望
一環碧玉遶城西



寒食前一日行部過牛首山

嶺花袍紫不知名
澗草茸青取次生
便是常州草蟲本
只無蚱蜢與蜻蜓

頭上高垂碧玉盆
誰將漂絮尚殘痕
青天幸自秋江樣
須惹三絲兩縷雲

繇山恨骨已寒灰
儘禁厨烟肯更回
老病不禁餽食冷
杏花餠粥湯去聲將來

出了長干過了橋
紙錢風裏樹蕭騷
若無六代英雄骨

牛首諸山肯爾高

單車一節又行春
敢為觀風惜病身
只是擔頭無柰子
枉教喚作踏青人

擣藍作雨雨宵傾
生怕難乾急放晴
一路東皇新晒染
桑黃麥綠小楓青

一春今歲雨中和
信道韶華定較多
二月半頭花已盡
脫空日月退還他

宿金陵鎮棲隱寺望橫山

再見橫山滴眼新山曾勸我脫官身燈籠簫鼓年年社
酒醖鶯花處處人忽憶諸公牡丹會轉頭五柝去年春
野雲墟月空荒寺兩袖寒風一帽塵

明發棲隱寺

木魚一呼衆僧聚老夫登車欲前去仰頭見天俯見地
明明是晝不是暮如何今晨天地間咄咄怪事滿眼前
將為是夜着月輪已沒星都落將謂是晝休銀河到晚
爛不收皎如江練橫天流中流點綴金沙洲元來海底

蚤浴日雲師閉關不教出羲和揮斧斫雲關取將一道
天光還天光淡青光白道是雲漢也則得雲師強狠
尅不奔堆作沙洲是碎雲

寒食日晨炊姜家林初晨之次日也

百五佳晨匹似無合教迎節却離居萬家寒食初歸燕
一老春衫政蹇驢耄柳已僧何再髮孺槐纔爪可遲蔬
兒書早問歸程日不用嗔渠只笑渠

午憩褚家坊清風亭

此老忒踈放與春無怨思何須寒食日恰是別家時荒
店兩三隻野花千萬枝前山有底恨也學客眉垂

莫道迎春好迎春是送春可憐一條路知老幾多人坦
綠偏宜鞦韆飄紅并作網青帘好消息今日擗頭新

宿新市徐公店

籬落踈踈一徑深樹頭新綠未成陰兒童急走追黃蝶
飛入菜花無處尋

春光都在柳梢頭揀折長條插酒樓便作在家寒食看

村歌社舞更風流

風花

海棠桃李雨中空更看清明兩日風
風似病癰無藉在花如中酒不惺鬆
身行楚嶠遠更遠家寄秦淮東復東
道是殘紅何足惜後來併恐沒殘紅

曉過葉家橋

鷄唱嗔人睡鴉啼喧客勞近山烟外
遠矮竹簷邊高老矣猶長鋏悠哉未
大刀繞圩無雜樹一色柳新縹

圩峻愁今路山行羨昨朝
閉窗深坐轎合眼過危橋
岸近何由到魂驚半欲銷
寄言薛丞相最穩是輕撓

過楊二渡

春跡無痕可得尋
不將詩眼看春心
鶯邊楊柳鷗邊草
一日青來一日深

兩日山尋儘野花
今晨水眺始桑麻
春風嬌得千垂柳
恰恨身材箇箇斜

柳見風時舞便輕
解將袞遍趁鶯聲
道他誇逞腰肢著

風罷元來倦不勝

宿青山市

青山業主是玄暉
太白無錢典得伊
總是詩仙休更訟
雨蓑分釣一漁磯

雲塗霧抹澹葱朧
萬匹霜綃罩玉龍
中有雙峰不爭長
諸峰情願長雙峰

近看青山却朗然
更無半點霧和烟
一峰是石高多少
到得峰頭即到天

市心酒店客來嘗且醺仙家十二郎鸚鵡鷓鴣何處覓
只將老瓦當瑤觴

題青山市汪家店

小小樓臨短短牆長春半架動紅香揚花知得人孤寂
故故飛來入竹窻

題廣濟圩

圩田歲歲鎮逢秋圩戶家家不識愁夾路垂楊一千里
風流國是太平州

兩渠水夾一堤寬箇是東皇大

音情

御園旋插綠楊能幾

日新枝已自不勝繁

桑疇一眼鬱金黃麥隴千機綠錦坊詩卷且留燈下看
轎中只好看春光

清明日午憩黃池鎮

莫笑孤村小市頭花邊人出浦邊游綠楊拂水雙浮鴨
碧草粘天一落鷗嬾困風光酣午睡陰沈天氣嫁春愁
阿誰道是清明節我對清明喚作秋

宿橫岡

我豈忘懷一畝居誰令愛讀數行書秋南春北雁相似
柳思花情鶯不如上市魚鰕村店酒帶花菰芥晚春蔬
長亭一醉非難事造物相撩莫管渠

夜雨曉發橫岡

醞造通宵雨殷勤數日風如三濃穉綠第一淡蔦紅潤
物初非惠司春豈有功老農私獨喜不羨去年豐

道傍雨中松

莫信秦人五大夫一生清苦不數腴也將青玉瑀釵子
一一釵頭綴兩珠

宿新豐坊詠瓶中牡丹因懷故園

客子泥塗正可憐天香國色一枝鮮雨中晚斂寒如此
燭底宵暄笑粲然自覺玉容微婉軟急將翠掌護嬋娟
江南也有新豐市未羨賓王酌聖賢

天下花王絕世無儂家移得洛徽蘇花頭每朵一千葉
親手前春五百抹雪白猩紅相映帶嬌黃釀紫更敷腴

鄉魂開眼歸將去飛過長江彭蠡湖

宛陵道中

溪繚雙衣帶橋森百足蟲傘聲松徑雨巢影柳塘風犬
誤隨行客牛偏識牧童追程非要緩路滑試匆匆

題趙昌父山居八詠

竹隱

大隱隱於酒小隱隱於竹何不呼麴生來同此君宿

宴齋

五陵槿梢花千駟草頭露富貴人始去聲傳屢空今不數

苔竹軒

青士長得瘦翠兄工買貧向來素愛者已賺一詩人

兩峯堂

踏得草鞋穿行得汗脚損却換一枝藤拄到雙玉笋

已矣軒

蠻觸無休日菟裘有別天撫松非已矣採菊未悠然

倚雲亭

俗子令眼白瑞峯令眼青自移聽雨榻且上倚雲亭

霞牖

夕借月為燭晨將霞作簾猶言貧到骨不悟取傷廉

青氈堂

客來借氈看笑指一書冊不管賣不行且圖偷不得

曉晴發黃杜驛

望後月不落偏於水底明對懸雙玉鏡併照一金鉦忽
值山都合渾無路可行多情小花徑導我度千縈

蒼竹歌將倒林花濕不飛總將枝上雨洒入轎間衣暗
色猶全嫩春寒肯便歸祇能欺客子戶戶閉荆扉

初曉明朗忽然霧起已而日出光景奇怪

明發望遠山一一粲可數幽人萌望心便被山靈妬遂
巡出神通變化足驚怖初將兜羅綿擘作霏微絮週遭
裏世界仰視失天宇高懸赤瑛盤不計丈尺許下照空
濛間紅光貫輕素中有人物影紛紜競來去亦各有所
持莫辨是何具猶嫌未奇怪別出奇怪處珠立一路幢

瑶森四山樹橫空金橋梁拔地玉宰堵駭目方諦觀捲
地急收去恍疑刮眼膜依舊認山路那知幻與真不記
夢兼悟神遊蛾眉山誑俗笑佛祖笑誑却被誑佛祖還
笑汝

晨炊杜遷市煮笋

金陵竹笋硬如石石猶有髓笋不及杜遷市裏笋如酥
笋味清絕酥不如帶雨斲來和籜煮中含柘漿雜甘露
可齏可膾最可羹繞齒蔌蔌冰雪聲不須呪笋莫成竹

頓頓食笋莫食肉

新路店道中

去秋行部慘山容得似春山意態濃嫩綠峰當新雨後
亂紅花發爛晴中仙姿玉骨丹青寫霧鬢風鬟錦綉幪
染得筆頭生五色急將描取入詩筒

朝道旁楓松相倚

雙楓一松相後前可憐老翁依少年少年翡翠新衫子
老翁深衣青布被更看秋風清露時少年更換輕紅衣

莫教一夜霜雪落少年赤立無衣著老翁深衣却不惡

雨後田間雜紀

稻田滴水價千金溪澗求分不肯分一雨萬畦都水足
却將傾瀉作溪渾

田水高低各鬪鳴流溪奔放更驩聲小兒倒撚青梅朶
獨立茅簷看客行

行到深村麥更深放低小轎過桑陰再三傳語春寒道
好為農家惜綠針

晴路無泥亦未埃
野雲儘薄不全開
滿山都是長松樹
無數揚花何處來

正是山花最鬧時
濃濃淡淡未離披
映山紅與昭亭紫
有大花而淺
紫名昭亭花
挽住行人贈一枝

宿白雲山奉聖禪寺

徑夾長松地照青
眼看高閣與雲平
出林殿脊先知寺
滿地花枝未見鶯
上到峯頭千嶂合
下臨嶺脚一溪橫
山寒入骨冰相似
冰去聲殺人來却道清

登奉聖寺千佛閣

一隻奇峰入眼中看來隻隻是奇峰
好山道是無重數
少說青蒼千萬重

遠山細膩近山麓別處求麓也則無
更向遠山山外看
教君病眼一雙枯

長誦懸崖置屋牢此詩此閣晚相遭
閣中未見高低在
下到山門始去聲是高

何處飛來雙白鷗碧山貼出雪花浮
倚欄只管移床立

看到雙鷗沒處休

過寧國縣

薄日烘雲未作霞，好風怯冷著輕紗。
絕憐山色能隨我，政用花時不在家。
騎吏那愁千里遠，牡丹各插一枝斜。
細看文脊空多肉，不似青陽看九華。

但無
九華

文脊山在寧國縣
其高大不減九華

桑茶坑道中

兩邊山木一溪風，盡日行程在井中。
猶喜天圍能里許，

井中那得箇寬通

田塍莫笑細於掾便是桑園與菜園
嶺脚置錐留結屋盡驅柿栗上山顛

沙鷗數箇點山腰一足如鉤一足翹
乃是山農墾斜崦倚風無力政無聊

上山入屋下山鉏圖得生涯總近居
桑眼未開先著耒麥胎纔出便生鬚

秋疇夾岸隔深溪東水何緣得到西
溪面祇銷橫一覓

水從空裏過如飛

蠶麤今歲十分強
催得農家日夜忙
已縛桁竿等新麥
更將了木撐歌桑

清明風日雨乾時
草滿花隄水滿溪
童子柳陰眠正着
一牛喫過柳陰西

山根一徑抱溪斜
片地纔寬便數家
漫插漫成隄上柳
半開半落路旁花

明發周村彎

不住寬鄉住甕門那知世上有乾坤環將峻嶺包深谷
圍出餘天與別村茅屋相挨無著處花溪百摺不教奔
江淮地迴寒無價宣歙山寒更莫論

過五嶺

昨日山行尚有村今朝嶺塞更無門仰攀苔磴上絕頂
却倒去聲籃輿下峻巒身覺去天纔寸許岸臨無地不堪
看前頭尚有芙蓉在此嶺難登未是難芙蓉嶺最險在
婺源五嶺之數

過湖駱坑

說盡山寒未識寒此間寒不是人間岩崖泉凍琉璃澗
冰雪雲封翡翠山一擔衣裳都著盡兩邊牕子更深關
聳肩縮頸仍呵手無策能溫兩腳頑

已被山寒病老身車徒溪涉更艱勤霧皆成點無非雨
日出多時未脫雲猿鳥一聲人不見松杉四塞徑無痕
十分晴暖儂何福肯借曦光三五分

安樂廟頭

誰遣詩家酷愛山愛山說得口瀾翻千峯萬嶺爭投奔

一陟三休却倦煩推案滿前何處著枯腸飽後豈能餐
殘嵐賸翠渾無用包寄金陵同社看

未至安樂坊隔林望見霜鏗嶺兩峯特奇

天知老子厭凡山別放潛環伏寶看一行音橫林遮嶺
脚兩峯如笋出雲端舉頭瞥見還驚遽到骨清奇特地
寒彼此相遭有緣法悔將嗔喜觸巔巔

安樂坊牧童

前兒牽牛渡溪水後兒騎牛回問事一兒吹笛笠簪花

一牛載兒行引子春溪嫩水清無渣春洲細草碧無瑕
五牛遠去莫管他隔溪便是羣兒家忽然頭上數點雨
三笠四蓑尅將去

宣歙道中

天齊玉立萬孱顏三日深行紫翠間便是昨來千佛閣
望中見此兩州山詩家寒刮少陵骨宮樣高梳西子鬟
祇好遙看莫登覽今晨登處鬢都班

新安江水自績溪發源

金陵江水只鹹腥，敢望新安江水清。
皺底玻璃還解動，瑩然鄰淥却消醒。
泉從山骨無泥氣，玉漱花汀作珮聲。
水記茶經都未識，謫仙句裏萬年名。
太白云：借問新安江，見底何如此？又云：何謝新安水，千尋見底清。

宿黃土龕五更聞子規

通宵不睡睡方奇，夢裏驚聞子規啼。
只是一聲已腸斷，況當三月落花時。
不論客子愁無那，便遣家人聽亦悲。
歸到江西歸始了，江東歸得未為歸。

明發黃土龕過高路

又過崢嶸兩峽間也無溪水也無田嶺雲放脚寒垂地
山麥掀髯翠拂天碧玉屏風吹不倒青綾步障買無錢
詩人富貴非人世猶自淒涼意惘然

寄題周元吉左司山居三詠

酣賦亭

詩酒如今誰主盟須還酣賦老先生三杯兩醖鶯花底
一斗百篇談笑成太白自翻新樂府小蠻度入妙歌聲

生前身後名兼飲二事何曾有重輕

可止亭

金印龍章屬市朝清風明月屬漁樵世皆蠻觸君知止
渠自王公我豈驕真箇歸田何必賦自家甘隱不緣招
老夫三徑都荒了松菊雖存已半凋

適菴

莫道尊鱸不近名儘談鴈鷁未忘情醉中賭得茗溪月
醒後還輸茂苑鶯豈但二豪俱不見向來三傑亦何成

有人來問適菴趣便是公榮也一觥

晨炊泉水塘村店無肉只賣笋蕨朝亭父

屠門深閉底須愁土銚無烟也莫羞笋便落林猶勝肉
蕨纔出土更饒油萬錢下箸今安在一飯流匙飽即休

吾道藜羹元不糝至今諱殺古陳州

陳州人諱餓
殺孔夫子

高視石嶺雨中雲氣蔽虧山色隱顯

絕頂仙人富寶熏水深山子不論斤堆從平地到天半
併作清香一炷焚煙繞翠環蒼玉珮身披白縠素羅裙

更將萬斛薔薇露洒作桑麻萬頃雲

詠績溪道中牡丹二種

絲頭粉紅

淡醋紅千葉感皺渾是花片無葉甚麗其清香軟花頭重五六兩許

看盡徽蘇譜與園牡丹未見粉絲君
春羅淺染醋紅色
玉板感成裙褶紋頭重醉餘扶不起
肌香淑處淡仍芬
老夫生有栽花癖客裏相看為一醺

重臺九心淡紫進退格

明紫外有大片托盤甚瑩不皺中甚碎花

片而碎片之中又突起九高片高下皆皺葉
鬱金點綴生於高下花片之上甚佳其香清

媚而
微醺

紫玉盤盛碎紫綃碎綃擁出九嬌嬈即將些子鬱金粉
亂出中央花片梢葉葉鮮明還互照婷婷風韻不勝妖
折來細雨輕寒裏正是東風坼半包

宿三里店溪聲聒睡終夕

破驛荒村山路邊斜風細雨客燈前子規一夜啼到曉
更得溪聲始去聲不眠

曉行道旁杜鵑花

泣露啼紅作麼生開時偏值杜鵑聲杜鵑口血能多少
不是征人淚滴成

曉行聞竹雞

山行三日厭泥行幸自今晨得一晴又聽數聲泥滑滑
情知浪語也心驚

一番行路一番愁還自兒時到白頭路不喚君君自去
為誰着急不歸休

曉過新安江望紫陽山懷朱元晦

紫陽山下紫陽翁
今住閩山第幾峰
退院歸來罷行腳
被他強占一江風

明發茅田見鷺有感

自嘆平生老道塗
不堪泥雨又驅車
鷺鷥第一清高底
拂曉溪中有幹無

雨中春山

誰作春山新障子
尖峯為筆天為紙
近看點出八九山
山外遠山三萬里
紙痕慘淡遠山昏
上有長松青到雲

自嫌松色太青在旋拈粉筆輕輕蓋須臾粉淡松復青
至今遠山描不成

明發西銘晨炊藹岡

盤蔬盃飯趁朝飢爭指枯腸作地基不覺南山新笋蕨
攪先占却未多時

人家爭住水東西即是臨溪却背溪撈得一家無去處
跨溪結屋更清奇

也知水碓妙通神長聽舂聲不見人若要十分無漏逗

莫將肩斗鎮隨身

宣歙就田水設碓非若江溪轉以車輻故碓大于身鑿以盛水水滿則尾

重而俯折乃起而舂

何須名苑看春風一路山花不負儂
日日錦江呈錦樣清溪倒照映山紅

明發祁門悟法寺溪行險絕

右緣絕壁左深溪頭上春霖腳底泥
溪裏仰看應落膽閑窻開轎不教知

一派泉從千丈崖轟霆跳雪瀉將來
無論驚殺行人着

斫音兩岸諸峯震欲摧

山不人烟水不橋溪聲浩浩雨蕭蕭何須雙鷺相溫暖
鷺過還教轉寂寥

溪行盡處却穿山忽有人家併有田幸自驚心小寧貼
誤看田水作深川

山行政好又逢溪況是危峰斗下時知與此溪有何隙
遣他不去抵相隨

已是山寒更水寒酸風苦雨併無端詩人瘦骨無半把

一任殘春料理看

過閭門溪

初門縣悟法寺下並大溪陸行二十里許兩山
環合復立雙石刺天如門溪水過雙石之間極
險名曰閭門縣之得名以此也門外乃可登舟
黟祁二邑水分源到此同流怒政奔忽值兩山盤作峽
更我雙石插為門中通翠浪纔容線仰看青天細似盆
艷潁瞿塘姑未問祇經此險已銷魂

閶門外登溪船

步下新船試水初打頭攬載適逢予一椽板屋纔經雨
兩面油窗好讀書刺買春園紅芍藥亂簪棐几竹籬篠
清溪浮取松亭子賞徧千山不要驢

上得船來恰對山一山頃刻變多般初堆翠被百千摺
忽拔青瑤三兩竿夾岸兒童天上立數村樓閣電中看
平生快意何曾夢老向閶門下急灘

當面峰頭些子雲坐看吹作雨紛紛朝來山路能愁我

今者溪船正要君遠嶺輕盈橫皺鼓明窗繚亂觸驚蚊
猶爭新漲一篙碧遮莫飄蕭二十分

選甚天時晴未晴舟行終是勝山行蓬欣雨點斜偏好
枕慣波聲夢不驚幸自車徒小休息又聞鼓笛開將迎
偶然回首來時路一夜霜毛一倍生

無家不住曲溪邊祇種高山不種田絕壁如天天入水
亂篙鳴石石鳴船百灘春浪雲頭過兩岸林花鏡底眠
歸路商量更舟楫廬山彭蠡好風烟

誠齋集卷三十四

欽定四庫全書薈要卷一萬五千六百十二

集部

誠齋集卷三十五

宋 楊萬里 撰

詩

江東集

舟過城門村清曉雨止日出

五日銀絲織一籠金鳥提取送籠中知誰放在扶桑樹
祇怪滿溪烟浪紅

深村可笑是居民生長深山埜水濱
總出籬東攜褱子走來岸上看官人

鬢鬆睡起攬詩編信手繙來誦數篇
忽有高聲仍絕叫隔篷知是上灘船

行人都上半山青記得前朝傍險行
左右回身看不徹兩邊已失一灘聲

地錦花鋪錦衣碧蒙茸上織紫花枝
垂楊舞罷鶯停唱不捲華綢待阿誰

入浮梁界

濕日雲間淡晴峰雨後鮮水吞隄柳脚麥到埜童肩漚
漩嬉浮葉烟吹倒入舩順流風更順只道不雙全

小灘

溪水無情如有情落灘告訴不堪聽前波到此方嗚咽
後浪依前作許聲

水到灘頭似語離自知無復再歸溪臨流莫洒離人淚
幸自灘聲未苦悲

船裏征人政念歸
居人來看却嗟咨
居人祇羨征人著
世世安生不自知

秧疇

田底泥中跡尚深
折花和葉插畦心
晚秧初撚金絨綫
先種輸他綠玉針
雲壟霧疇俱水響
絲風毛雨政春陰
莫聽布穀相煎急
且為提壺強滿斟

水中山花影

閑轎那知山色濃
山花影落水田中
水中細數千紅紫

點對山花一一同

宿樂平縣北十里西塘

破店能無漏孤燈肯更明
中間通客路終夜有人聲
坐又坐不得眠來眠未成
如何故山友抵死怨躬畊

道傍桐花

春色來時物喜初春光歸日興闌
餘更無人餞春行色猶有桐花管領渠

過樂平縣

筭蕨都無且則休菜無半葉也堪羞滿城都賣雪花簪
昨日愁人未是愁

過翥山渡

自閏月十九日過宣城入寧國績溪新安休寧
祈門浮梁至樂平皆山行三月四日出樂平南
二十里許過渡處始得平地江流甚濶喜而賦
之

千重溪水萬重山半月深行井底天井外還來天大

音

在江心一眼四無邊

過白兔嶺望見芙蓉峰七八峰最東一峰特
奇里人名為芙蓉尖云

看山須是高處看低處看來元不見君看矮子仰高人
只識長身那識面今晨雨止昇火輪一光銷盡千山雲
千山數日眼中失今晨頭角都爭出初登峻嶺也心驚
上到絕頂忽眼明天外數枝青玉筆飛入錦囊寒突兀
問來還是芙蓉尖闊開兩窓高捲簾

田路泥行

路是新泥作泥逢積雨滂如緣大鮎脊更繞九羊腸前
店看殊近行人覺轉長商量避五嶺辛苦恰相當

初欲
取葵

源路孫德操力勸云不若
避五嶺之險故取祈門

入弋陽界道傍兩石山一曰廬山絕妙一曰
石人峰次馬上有一石起立如人形云

一色將蒼玉雙堆作假山峰巒妙天下花草半岩間舊
瘦天風骨新晞兩髻鬟何人緣底恨化石立孱顏

芙蓉渡酒店前金沙芍藥盛開

山店春光也自妍芙蓉渡口數家村
簷輿低過金沙架籬落踈圍芍藥軒
孤客倦游殊寂寞雨花作意與溫存
可憐經眼忽忽去不折紅香到綠尊

晨炊橫塘橋酒家小窓

饑望炊烟眼欲穿可人最是一青帘
雙渠走水穿三店獨樹歌流蔭兩簷
窓扇透明仍挂上爐香未燼又多添
山邛祇苦無良醞嫌殺芳醪似蜜甜

午憩馬家店

兩日田間路泥深惱殺儂却從平地上再入亂山中水
送隨行日窓留退後峰生衣兼草靱年例試春風

過松源晨炊漆公店

側塞千山縫也無上天下井萬崎嶇昨朝曾過芙蓉渡
尋到溪源一線初

山北溪聲一路迎山南溪響送人行也知流向金陵去
若過金陵莫寄聲

後山荆水向東馳却被前山勒向西道是水柔無性氣
急聲聲怒慢聲悲

日高谷底始微暄嵐翠依然透骨寒說與行人忙底事
金鷄聲裏促銀鞍

莫言下嶺便無難賺得行人錯喜歡政入萬山圈子裏
一山放出一山攔

政是行人腸斷時子規得得向人啼若能淚得居民臉
始信春愁總為伊

獵橋午憩坐睡

路是山腰帶苔為石面花隔溪聞鳥語踈竹見人家雨
足晴須耐神勞睡却佳睡魔推不去知我怯新茶

答徐子材談絕句

受業初叅王半山終須投換晚唐間國風此去無多子
闕捩挑來祇等閒

過了頭岩

告老身心日互催又將烏帽點黃埃了頭岩下來仍往

四十三年十二回

野薔薇

紅殘綠暗已多時
路上山花也則稀
蕊直餘春還子細
燕脂濃抹埜薔薇

道傍石榴花

待闕南風欲炷香
東風打併住西堂
石榴已著乾蓓蕾
却問春歸有底忙

宿月岩

月華無滿亦無虧
天借寒光劣半規
長挂冰盤下弦魄
新生丹桂出輪枝
偏令南省登金客
爭賦東堂片玉詩
傳語姮娥還有妹
請分一箇住幽奇

解舟上饒明暉閣前

玉水風舡擘岼開
一帆飛到雨花臺
思量饒歛山溪路
夢裏正行也莫來

和王道父山歌

東家娘子立花邊
長笑花枝脆不堅
却被花枝笑娘子

嫁期已是蹉去聲春前

阿婆辛苦住西鄰
豈愛無家更願貧
秋月春風擔閣了
白頭始嫁不羞人

附王道父原作

夜卧舟中間有唱山歌者倚其聲作二首

生來不識大門邊
一片丹心石樣堅
聞得阿郎誰得
婦無媒爭得到郎前

種田不收一年事
取婦不著一生貧
風吹白日漫山

去老却郎時懊殺人

雨後泊舟小筓回望靈山

靈山相識已平生雨後精神見未曾
一朶碧蓮三萬丈數來花片八千層
雲姿霧態排天出竹杖芒鞋欠我登
羨殺峯頭看山寺厭山不看是諸僧

小筓舟中望月

偶於古柳繫春船雲散千峯月滿川
跳入廣寒宮裏坐下看碧玉鏡中天
斯須萬象都成雪遮莫三更且未眠

歸到金陵入官府夢中說夢也無緣

過龜峰

大龜昂首瞻南天仙人赤脚騎龜肩小龜一雙走隨母
指爪穿盡追不前仙人不知卜何事踏脫綠毛紛滿地
老夫也要鑽一鑽何日故園遂歸計

寄題程元成給事山居三詠

癸心堂

人笑戎葵定自癡不愁曦景早兼遲便令隔霧光難到

也則傾心苦為誰衛足平生非我志向陽一點只天知
話頭試問伯休父休父丹衷便是葵

秀野堂

梅卉來禽帶月栽牡丹菡萏照江開新安見底正如此
舊雨故人從來秀色埜香供雪飲名章俊語用雲裁
無論獨樂兼同樂殘面春風翠作堆

攬有亭

葵心一岫卓南涯秀野諸峰走北來中起新亭雙奄有

盡驅景物四邊回
木居士作煨塵嘆孤竹
君真梁棟材
知有此亭無比樣
併煩與可洒松煤

亭材不用木
以竹為之

野茶蘼

去歲諸司賞物華
茶蘼一會屬儂家
今年不識茶蘼面
却買茅柴對堊花

不識茶蘼恨殺人
堊花香裏度芳晨
寄牋為報東皇道
不理今年一箇春

舟過安仁

恰則油窓雨點聲霎時花與日華明不須覆手仍翻手
可殺春雲没十成

初愛遙山獻畫圖忽然卷去淡如無莫欺老眼猶明在
和霧和烟數得渠

一葉漁船兩小童收篙停棹上船中怪來無雨都張傘
不是遮頭是使風

南風作雨北風休豈是春雲得自由只者去聲天晴過湖
得長年報道不須愁

渭川千頃在詩胸
不管屠羊肆裏空
踏破菜園坊底事
莫教踏到竹園中

過鄱陽湖天晴風順

湖外廬山已見招
春風好送木蘭橈
青天挾日波中浴
白晝繁星地上跳
萬頃琉璃吹一葉
半簪霜雪快今朝
廬陵歸路從西去
却峭東帆趁落潮

舟至湖心望豫章西山雲起風雨驟至

橫洲送我急俱還
四顧無邊已慘顏
雪浪撞天吞几子

湖心拋雲將雨起西山一聲霹靂從空下萬丈金蛇掣
斗間舟子驚呼總無色平生忠信且今番

悶歌行

阻風泊湖心康郎山旁小舟三宿作悶歌行

山行舊路不堪重及泛湖波又阻風世上舟車無一穩
乾坤可是剩詩翁

同列諸公總勸予歸時切莫過重湖婺源五嶺祈門峽
今是危塗是坦塗

一夜顛風翻却天簑將白浪到天邊康郎尚自無根脚

斗大

音情

洲頭却繫船

問來鄔子到南康水路都來兩日強屈指行程誰道遠

如今不敢問都昌

都昌至南康尚百里

書策看來已覺煩詩篇壓了更休論客心未便無安頓
試數油窓雨點痕

一風拋起萬瓊樓几子康郎總掉頭莫怕浪高洲盡沒

海船下碇併無洲

新詩哦罷倦來眠
蝴蝶飛游八極邊
船外風濤如霹靂
一聲不到睡鄉天

湖心何處有人煙
上下雙天兩點山
犬吠鷄鳴四船裏
旋成水國一家村

船上猶餘一日糧
湖心糧盡糴何鄉
仙家辟穀從誰學
明日無炊即秘方

南人方理北歸舟
北地風來便作愁
不到北船等多日
北風不作不成休

大風動地捲波頭，索酒頻添醉未休。
不判明朝教作病，却圖今夕要忘愁。

風氣掀天浪打頭，只須一笑不須愁。
近看兩日遠三日，氣力窮時會自休。

明發康郎山下亭，午過湖入港小泊棠陰砦。
回望豫章兩山慨然感興。

大江日東流，我坐自向西。亦復拜新月，不為學蛾眉。
叅惟月生處，下臨故園池。青松一萬樹，牡丹三十枝。
林下

枕北山簷前漱南溪歲歲身不到夜夜魂必歸魂歸諒
何益夢覺心自怡夢魂尚如許而況身歸兮前日至鄔
子西山出湖湄如見鄉人面一笑相娛嬉旅情得暫忻
鄉愁動長思今朝發康郎一路能相隨一船趨都昌回
首尚見之偶爾轉港汊極目烟水迷不得一揖別悔我
庸何追

解舟棠陰砦

湖盡有殘渺情知無博瀾縱眺猶杳空至竟濟者安回

思遇險時分晷過亦難亦豈有奇畫死生聽之天安知
天矜否此外無控搏一風動旬日三日忽自闌未涉浪
自怖既涉焉用驪畏塗已數踐老命偶再全還家切勿
訴空遺兒女潛亦勿訴同列同列已預言

宿四望山下望廬山

過湖見遠岫澹若橫碧烟晨蔚動霽暉春滋涵雨鮮人
世那有此心疑是廬山宿驚恍未定欲問無暇言落日
泊四望諸峰森在前老夫急親指舟子答果然平地起

屏障倚空開旗幟潛抱秀潤質不露竒怪顏乃知名山
尊未與凡嶺班嚴重王公體雍容古聖賢何必出鋒銳
要駭俗子觀坐令我生敬瞻仰忘憂端更得孤月出開
篷望晴巒

明發四望山過都昌縣入彭蠡湖

衆船爭取疾直赴兩山口吾船獨橫趨甘在衆船後問
來風不正法當走山右不辭用盡力要與風相就忽然
挂孤帆吾船却先走

宿廬山栖賢寺示如清長老

清風迎衣襟白雲捧脚底飄然徑上廬山頭誰道栖賢
三十里鄉禪引到獅子峰旃檀噴出香霧濃此一瓣香
為五老一笑問我顏猶紅右看南嶽左東海方丈祝融
扶輕黛羣仙遙勸九霞觴金盤玉箸鯨魚膾急呼清風
與白雲送我更往會列真鄉禪恐我忽飛去挽著衣襟
復留住下視落星石一拳長江一線湖一涓醉掬玉淵
亭下泉磨作墨汁洒醉篇

題栖賢寺三峽橋

栖賢與楞伽初本共一山古潭宅神龍睡醒厭久跼是
夕起雷雨震得天地翻此山坼為兩一溪斷中間下窺
黑無地上攀青到天從此兩禪寺路絕不往還祖師見
之笑彈指降神姦問天借橫蜺搭渡溪兩邊倒傾千崕
雪飛下一玉淵餘愁尚雷吼聲振諸峰根我來不能去
輕生倚危欄忽然心為動毛骨森以寒上人指斷岸猶
帶初坼痕

徧游廬山示萬杉長老大璉

余夜宿栖賢詰朝行散同臨川危科逢吉南豐
黃文暉世高永嘉周寓泰叔宣城郭儀令則栖
賢老如清萬杉大璉開先師序歸宗道賢徧觀
廬山紀行示萬杉

肩輿小斑筠地志古清冊初穿千長松忽仰萬絕壁觀
山不知名披志失山色行行問不住一一漸可識何代
五老人登峰化為石年齡凡幾春齒牙諒無力天賜五

玉乳與渠供朝食淵明醉眠處石上印耳迹逸少養鵝
池蘚花漬餘墨鶴鳴南天青龜拜北斗白栖賢緣不淺
月枕借雲席萬杉與開先美泉碎珠璧病眸貪窮眊跼
趾怯周歷同游多俊乂談話半禪伯茲來殆天假不爾
豈人及歸船載曉星回首兩相憶

五老五乳鶴鳴龜行
皆峰名龜行而歸北

斗也山上有淵明
醉石右軍鵝池

題漱玉亭示開先長老師序

山根玉泉仰面飛飛出山頂却下馳自從廬阜瀉雙練

至今銀灣乾兩枝雷聲驚裂龍伯眼雪點濺濕姮娥衣
寄言蘇二李十二莫愁瀑布無新詩

又跋東坡太白瀑布詩示開先序禪師

東坡太白兩詩翁詩到廬山筆更鋒倒挂銀河分一派
擘開玉峽出雙龍天孫織錦機全別仙子裁雲手自縫
畧破青山安用洗浣他瀑布却愁儂

贈歸宗長老道賢

地下歸宗天下傳老夫剝欲到雲邊王宏送酒催歸去

且省遠公沽酒錢

過江州岾回望廬山

廬山山南刷銅綠黃金鋸解純蒼玉廬山山北潑藍青
碧羅障裏翡翠屏昨日山南身歷徧今朝山北舟中看
山南是我所部民山北是我鄉中人部民鄉人何厚薄
有人問我山美惡詫南賒得鄉里嫌評北又道月旦嚴
兩平只在一言內山如西子破瓜歲山南是面北是背

南石山
北土山

大孤山

小姑小年嫁彭郎大姑不嫁空自孀小姑有夫似織女
大姑無夫如阿姆慈湖也曾說媒妁執柯教與五老約
東方一老差妙齡

五老峰東
一峰短小

匹似彭郎却老成大姑背

面啼更道豈有老人會年少大姑年來年去今亦老

過湖口縣上下石鐘山即東坡所記者是夕

宿其下

上鐘山下鐘山兩鐘爾大何處懸滄波作杵天作簾懸

在江湖都會間蜀江西來一萬里章江南來會於此更
看鄱陽與彭蠡混同四水作一水萬歲千秋撞不止兩
鐘可是難當抵上鐘打得到骨髓下鐘打穿胸腹底世
無坡老辨古器誰知出自周與魏老夫不能認款識願
聞大聲開病耳今夜明月正無滓

發揚港渡入交口夾

朝雨匆匆霽春山歷歷嘉老青交幼綠暗錦出明花漁
艇十數隻雞聲三五家人生須富貴此輩亦生涯

入夾寬中窄臨流慢處深朝陽明衆岫西崦自多陰脫
袴嗔人儉提壺侑我斟老來除飲外半點沒春心

山斷情相接江同派暫分無風猶細浪有日却輕雲生
熟衣中半陰晴氣兩層還家渾欲早徐棹也堪欣

荻岬何時了松舟幾日停波來全蜀白樹去兩淮青柔
爐殊清響征人自厭聽不知誰子醉垂手瞰江亭

小姑山

大姑老已醜小姑少而秀婷婷獨立水精宮羅幃生塵

飄翠岫彭郎坦腹方醉眠小姑起舞春風前古來同室
無雙美天壤乃有彭郎子

大孤一方石立中流前昂後低小孤相去二百里小姑一

大石峰甚秀彭郎磯一橫石與小姑對立兩岬舟過其間

水螳螂歌

清晨洗面開蓬門巨螳螂在水上奔前怒兩臂秋竹竿
後拖一腹春漁船偶然拾得破蛛網挈取四角沉重淵
柳上螳螂工捕蟬水上螳螂工捕鱸捕蟬頓頓得蟬食
捕鱸何曾得魚喫

阻風鄉口一日詰朝船進雨作再小泊雷江
朔吹憎船進東瞰讓雨行雲移青嶂動雅度白雲明淹
泊寧吾願吟哦且客情江邊一株柳憔悴似餘生

幸自無多雨其如不肯晴響窓疎復密暈水滅還生鶯
競波中影山凝島外情殘春只五日留取作江行

山已多姿了雲仍太劣生濃橫半嶺白淡掃數峰青照
水影顛倒迎曦時晦明吾情不孤殺去聲天賜碧瑤屏

解舟雷江過東流縣

雲散煙還合天晴日半烘青山猶淡白碧水欲輕紅棹
追欣恬浪公無怨逆風因思五湖裏敢望大江東

阻風泊舒州長風沙

苦被淮西市苛留江表船聞村紅米賤著網白魚鮮元
是滄浪客況逢花柳天山川嗔老我醒眼對風煙

解纜鸞溪北浮舟雁汊東纔逢一日順却阻四程風萬
事乘除裏十年瞬息中請君明著眼造物一狙公

廬山下有

鸞溪橋

江雨

雨點飛來水面初濕銀盤裏走真珠龍宮可是忙收拾
萬斛齊傾半霎無

雨裏油窓莫要關滴來堪翫洒波間萬珠貢入龍宮了
賸得簷前數顆看

翡翠洲橫紅錦川真珠汁洗水精甌江天萬景無拘管
乞與詩人塞滿船

三月晦日

春光九十更三旬暗準三旬賺殺人未到曉鐘君莫喜
暮鐘聲裏已無春

過池陽舟中望九華山

役役催行邁匆匆過此春杯翻五湖月筆掃九華雲不
是風煙好何緣句子新茲游四千里今日過三分

解舟銅陵望淮山白雲

天惜淮山不惜銀渾銀砌起一長城淮山裹在銀城裏
半出諸峰越樣青

銀城遮不盡淮山許事何緣便達天誰遣詩人強饒舌
和山失却忽蒼然

隔岸

隔岸淮南樹中流渡北人數來無急務一數一回新

題東西二梁山

發蕪湖舟過東梁西梁二山皆石峰夾大江對
立兩涯即采石蛾眉亭所望見如雙眉者

二梁雙黛點東西牛渚看來活底眉阿敞畫時微失手

一眉高著

音研

一眉低

莫恨當初畫得偏，却因偏處反成妍。
喜來舒展愁來蹙，各樣嬌嬈更可憐。

傳道臨春昔麗華，不從陳帝入隋家。
獨將亡國千年恨，留下雙顰寄岬花。

舟過凌歊臺望謝家青山

南風久別忽言還，又苦河流九曲灣。
若要順風兼順水，柁頭背指謝家山。

發慈湖過烈山望見歷陽一帶山

夢繞天津月再灣
慈湖解纜已開顏
淮山到眼渾相識
直北青梢是定山

一出還添二百詩
風光投到費推辭
江湖物色休吟盡
留取西歸一半題

舟過鵝行口回望和州雞籠山

兩月青山不暫離
入城未見有山時
萬峰送我都回去
只有雞籠未肯辭

讀唐人于瀆劉駕詩

劉駕及于瀆死愛作愁語未必真許愁說得乃爾苦一字入人目蜚出兩睫雨莫教雨入心一滴一痛楚坐令無事人吞刃割肺腑我不識二子偶覽二子句兒曹勸莫讀讀著恐愁去我云寧有是試讀亦未據一篇讀未竟永慨聲已屢忽覺二子愁併來遮不住何物與解圍伯雅煩盡護

跋常寧縣丞葛齊松子固衡永道中行紀詩

卷

一江風月兩溪雲總與誠齋是故人老向煙波詩句裏

一朝雙看兩州春

葛君自號煙波子

跋葛子固題蘇道士江行圖

江行圖上指君山寄語烟波不用看亟買水船歸雲水
全家搬入畫圖間

送丘宗卿帥蜀

人似隆中漢卧龍韻如江左晉諸公四川全國牙旗底

萬里長江羽扇中
玉壘頓清開宿霧
雪山增重起秋風
近來廊廟多西帥
出相誰言只在東

諭蜀宣威百萬兵
不須號令自精明
酒揮勃律天西枕
鼓卧蓬婆雲外城
二月海棠傾國色
五更杜宇說鄉情
少陵山谷十年恨
不遇丘遲眼為青

蜀人說蜀不能休
花作江山錦作州
老我無緣更行脚
羨君來歲領鼇頭
碧鷄金馬端誰見
酒肆琴臺訪昔游
收入西征詩集裏
憶儂還解寄儂不

題曾無疑雲巢

蘭蕊溪頭子曾子曰飯蘭花飲溪水猶嫌塵土沈荷衣
移家龍山西復西清晨芒屨上山嘴瞥見寸雲石邊起
急追捉得絮一毬襟衣袖裹不放休須臾奔騰觸懷出
散滿晴空那可收雲師却與曾子戲展為大幕褰為帔
獨攜曾子登雲巢其上無天下無地忽聞阿香笑一呼
曾子驚顧巢亦無歸來作巢學雲樣夜夜雲來宿巢上
寄題廬山楞伽寺三賢堂呈南康太守曾致

虛

山房牙籤三萬軸六丁下取歸羣玉空餘坡老枯木枝
雪骨霜筋插雲屋楞伽老僧懷兩賢作堂要與祠千年
只供清風薦明月不用秋菊兼寒泉江西社裏曾常伯
李家玉潤蘇家客併遣巫陽招取來分坐廬山泉上石
自金陵得郡西歸曉發梅根市舟中望九華
山進退格

山外雲濃白峰頭日淺紅橫拖一疋絹直掃九芙蓉奔

走來船裏提攜入袖中寄言杜陵老不用剪吳松

發趙屯得風宿楊林池是日行二百里

動地風來覺地浮拍天浪起帶天流舞翻柳樹知何喜
拜殺蘆花未肯休兩岼萬山如走馬一帆千里送歸舟
出籠病鶴孤飛後回首金陵始欲愁

題謝昌國桂山堂

艮齋引袖出明光歸卧江西一草堂種滿山中渾是桂
怪來月窟更無香九秋金粟供朝飭三徑黃花併夕糧

履上星辰冠上豸一時脫却濯滄浪

誠齋集卷三十五

謹案卷三十四第二頁前六行一春今歲雨中和
按和疑當作過


第三頁後二行也學客眉垂按宋詩鈔眉垂作顰
眉

卷三十五第三頁後一行滿城都賣雪花薺原本
薺訛薺据別本改

第十六頁後二行栖賢緣不淺原本淺訛請据別
本改

第十八頁前三行大姑無夫如阿姆原本姆訛姪

今改



總校官庶吉士臣張能照

校對官庶吉士臣陳墉

謄錄監生臣朱烺

謄錄監生臣浦煊

欽定四庫全書薈要

集部

誠齋集卷三十六

七

詳校官助教臣謝登雋



欽定四庫全書薈要卷一萬五千六百十三

集部

誠齋集卷三十六

宋 楊萬里 撰

詩

退休集

自金陵西歸至豫章發南浦亭宿黃家渡

過了重湖雪浪堆
章江欲盡淦江來
到家無此江山景
畫舫行遲不用催

送劉惠卿

安成劉惠卿名彥仁善醫有子讀書攜良齋詩
見過作兩絕句書於後

活却千人藥一囊陰功吹作滿城香
靈椿丹桂君家有
莫羨燕山竇十郎

舊病詩狂與酒狂新來泉石又膏肓
不醫則是醫還是
更問無方定有方

十月四日同子文克信子潛子直材翁子立

諸弟訪三十二叔祖於小蓬萊酌酒摘金橘

小集戲成長句

誠齋老子不奈靜偶挂烏藤出苔徑獨遊無伴却成愁
羣從同行還起興每過一家添一人須臾保社如煙雲
褰裳涉溪溪水淺著履渡橋橋柱新蓬萊一點出塵外
南溪裏在千花裏芙蓉照波上下紅琅玕繞屋東西翠
槿籬竹戶重復重雞鳴犬吠青霞中蓬萊老仙出迎客
朱顏綠髮仍方瞳餐菊為糧露為醕染霧作巾雲作屨

欣然領客到仙家行盡蓬萊日未斜更傾山瓢酌山酒
酒外瓢邊亦何有偶看小樹雙團欒碧琉璃葉黃金丸
主人忍喫不忍摘笑道未霜猶帶酸小僮隨我勇過我
不管仙翁惜仙果爭挽風枝揀霜顆爭獻滿盤來飣坐
隔水蓬萊看絕竒蓬萊看水海如池主人勸客對絕境
不飲令儂怒生癭何如寄下未盡瓢留得早梅賞疎影

水仙盛開留子上弟小酌

手種凌波香今歲便十秩要知誠齋中富抵水仙國有

酒便欠花有花恨無客與子對花前不醉便了得待勸
已非真不勸兩自索安知醉與醒今夕定何夕

癸丑正月新開東園

長恨無錢買好園好園還在屋東邊週遭旋闢三三徑
只怕芒鞋却費錢

與子上雪中入東園望春

草草東園未整齊却於看雪最清奇莫嫌踏濕青鞋子
自有瓊瑤隔路泥

松關

竹林行盡到松關
分付雙松為把門
若教俗人來一箇
罰渠老瓦十分盆

萬花川谷

無數花枝客說些
萬花兩字即非夸
東山西畔南溪北
更沒溪山只有花

度雪臺

二月盡頭三月來
紅紅白白一齊開
餘醺正要金沙暎

莫道金沙只漫栽

碧瑤洞天

青松萬樹竹千竿蒼翠中間別一天從此洞天三十七
初頭且數碧瑤仙

三三徑

東園新開九徑江梅海棠桃李橘杏紅梅碧桃
芙蓉九種花木各植一徑命曰三三徑云

三徑初開自蔣卿再開三徑是淵明誠齋庵有三三徑

一徑花開一徑行

雪後東園午望

天色輕陰小霽中
晝眠初醒未惺鬆
梅橫破屋無多雪
雲放東山第一峰
不道風光虧此老
將何功業答殘冬
土羔菜甲鶯兒酒
醉入梅林化作蜂

玉盤盂

旁招自侍近江都
兩歲何曾見國姝
看盡滿欄紅芍藥
只消一朵玉盤盂
水精淡白非真色
珠璧空明得似無

欲比比花無可比且云冰骨雪肌膚

泉石軒初秋乘涼小荷池上

笑渠落片自成船吹泊高荷傘柄邊泊了又離離又泊
看他走徧水中天

寄朱元晦長句以牛尾狸黃雀冬猫笋伴書
大武尾裔名季狸目如點漆膚疑脂江夏無雙字子羽
九月授衣先著絮何如苗園孤竹君排霜傲雪高拂雲
子孫總角遁歸根金相玉質芝蘭芬三士脂韋與風節

借箸酒池俱勝絕先生胸次有皂白一醉不須問人說

跋臨川梁譯居士孝德記

雪裏星奔避亂兵母先子後赴寒冰祇知判得身俱死
不料子還母再生

祇箇當時發一心通天通地總渠臨芝蘭玉樹今爭秀

豈但一枝生桂林

一孫
登第

南齋前衆樹披猖紅梅居間不肄因為剪剔

道是司花定有神元來造化在詩人掃除碧樹無情葉

放出紅梅恣意春

七字長句敬餞提刑寺丞胡元之持節桂林
江西太守誰說子只說吉州有新事棘圍照日動碧鱗
粉堞入雲橫爛銀三年八邑八邑熟一任十日十日春
君不見吉州太守清何似白鷺江心秋見底除却太倉
五升米不曾遣人來入市四鄰束修來相看不將入家
將入官清名襲人冰霜寒隨風一夜入九關帝曰桂林
五千里象犀珠玉生海裏安得使者人人皆如此金指

於山珠抵水却從吉州奪吾侯一州奪與三十州梅花
一笑迎漢節桂花八嶺林吹雪使星歸去作臺星跳去聲
過郎星與卿月

答賦永豐宰黃巖老投贈五言古

吾友蕭東夫今日陳后山道腴詩彌瘦世忙渠自閒不
見逾星終每思即淒然都邑黃永豐與渠中表間黃語
似蕭語已透取上闕莫道不是蕭蕭乃墮我前佳句鬼
所泣盛名天所慳詩人只言黠犯之取饑寒端能不懼

者放君據詩壇

甲寅二月十八日牡丹初發

排日上牙牌記花先後開看花不予細過了却都回

燕脂樓子

樓子燕脂色燈前艷更鮮看花直到曉今夕不成眠

賞牡丹

把酒看花繞畫欄病身只得忍輕寒主人半醉花微卷
下却珠簾放牡丹

上祀日周丞相少保來訪敝廬留詩為贈

詩云楊監全勝賀監家
賜湖豈比賜書華
回環自闢三三徑
頃刻常開七七花
門外有田聊伏臘
望中無處不煙霞
却愁下客非摩詰
無畫無詩只謾誇

和謝

相國來臨處
士家山間草木也
光華高軒行李能過李
小隊尋花對浣花
留贈新詩光奪目
端令老子氣成霞

無論藏弃傳詒厥拈向田夫塾老誇

因種酴醾金沙作度雪臺以下臨之酴醾瘁
而金沙獨茂

獨種酴醾冷却伊金沙作伴暖相依酴醾枯了來季補
且看金沙也自奇

東園垣隅雙松可愛栽酴醾金沙以繞其上
雙松樹子碧團欒紅錦纏頭白錦冠儘放花枝過牆去
不妨分與路人看

登度雪臺

欲問金沙信聊登度雪臺
碧桃良解事開過架梢來

雨後復登度雪臺

三月東園近却賒東風
剪剪雨斜斜春雲雨打風吹盡
猶有金沙最後花

東園幽步見東山

日日花開日日新
問天乞得自由身
不知白髮蒼顏裏
更看南溪幾箇春

何曾一日不思歸請看誠齋入集詩到得歸來身已病
是儂歸早是歸遲

為愛東園日日來未曾動脚眼先開南溪頃刻都行徧
更到東園頂上回

天賜東園食實封東山加賜在園東東山山色渾無定
陰處青苔晒處紅

東園新種桃李結子成陰喜而賦之

桃李今春勝去春添新換舊却成新冥搜奇特根窠底

妙簡團欒樹子勻移處帶花非差事登時著子亦娛人
彼云千載方成蔭未解誠齋別有神

芍藥花

風雨敗花為花作宅上棟下宇瓦之壁之皆以
油簾

何以築花宅筆直松樹子何以蓋花宅雪白清江紙紙
將碧油透松作畫棟峙鋪紙便成瓦瓦色水精似金鷄
暖未煖銀竹響無水汗容漬不泣晴態嬌非醉盡收香

世畧關在閒天地風日幾曾來蜂蜨獨得至勸春入宅
莫歸休勸花住宅且小留昨日花開開一半今日花飛
飛數片留花不住春竟歸不如折插瓶中看

為牡丹去草

手種名花夢亦隨一年年望好花枝為花去草饒優處
兩袖青苔十指泥

雨後步東園

晴縑金線不勝垂寒勒青斜未放齊拄杖能言忽相報

三三徑裏已無泥

初夏即事

旋作東陂已水聲
纔經急雨恰新晴
提壺醒眼看人醉
布谷催農不自畊
一似老夫堪笑死
萬方口業拙謀生
嘲紅侮綠成何事
自古詩人沒一成

枕上聞子規

半世經行怕子規
一聞一嘆一霑衣
如今聽著渾如夢
我自高眠汝自啼

去年借宅寄生兒合歲羣兒又學伊羞面見他鶯與燕
向人強道不如歸

趙村

白樂天洛陽春詩云明日期何處杏花遊趙村
自注云洛陽城東地名趙村有杏花千樹又游
趙村杏花詩云趙村紅杏每年開十五年來看
幾回予東園杏花徑亭子因命曰趙村

杏花千樹洛陽春白傳年年愛趙村月藥晴葩風露格

老夫移得在東園

有歎

飽喜饑嗔笑殺儂鳳凰未可笑狙公儘逃暮四朝三外
猶在桐花竹實中

四月三日登度雪臺感興

高臺喜登眺登眺觸老晴入夏又涉春三餘安得停雨
欄漂耄丹風架舞壯青秧生麥將熟桑盡繭已成盛衰
亦其常無悴豈有榮古今非千載一瞬即古今慨然顧

八荒此理誰與評我爰諒無益有益或麴生生雖不能
言其言如雷霆但令我懷遣未問醉與醒

寄陸務觀

君居東浙我江西鏡裏新添幾縷絲花落六回疎信息
月明千里兩相思不應李杜翻鯨海更羨夔龍集鳳池
道是樊川輕薄殺猶將萬戶比千詩

寄張幼公

問訊子張子詩狂除未除年時一健步寄我數行書舊

矣哦招隱誰歟送子虛江湖隔京洛不是愛相疎

清曉行散

清曉東園政好嬉忽然竚立小遲遲為逢咫尺青松上
無數羣鶯政亂啼

喜雨

欲知一雨愜羣情聽取溪流動地聲風亂萬疇青錦褥
雲摩千嶂翠瑤屏行人隔水遙相語立鶯摧枝忽自驚
歲歲只愁炊與釀今愁無甑更無鉶

雨後子文伯莊二弟相訪同游東園

北阮稀相見東園肯到無
鞋留沙跡淺筓答雨聲疎
新長水三尺倒漂梅一株
炊煙起山崦好箇晚村圖

嘗桃

金桃兩釘照銀杯一是栽花一買來
香味此嘗無兩樣人情畢竟愛親栽

菊夏摘則秋茂朝涼試手

種菊君須莫惜他摘教禿禿不留些
此花賤相君知麼

從此千千萬萬花

雲際院小池荷花纔落一葉急收之

欲落荷花先自愁如何落後免沉浮誰將碧玉圓盤子
和葢和花一一收

六月初四日往雲際院田間雨足喜而賦之
高下田疇水關鳴汜深路滑不堪行請君聽取行人語
只箇愁聲是喜聲

去年今日政迎神禱雨朝朝禱得晴今歲神祠免煎炒

更饒簫鼓賽秋成

題王才臣南山隱居六詠

莊敬日強齋

居人晏猶眠行人夕未宿此心從何生却道力不足

格齋

讀書須何如問羊馬何與二里仍兩心終無研究處

南谷

我生本南溪我長寓南谷是子底無良奪我谷中菊

竹亭

春亦只如是冬亦只如是別有一清風請君參此味

松菴

與花不同色與竹元同德風月徧相尋攜手清涼國

腴亭

蜀張與蜀花鄉人相解后人存花更腴人去花亦瘦

夏夜誠齋望月

山居道是沒空庭不道誠齋敞更明萬里清天元是水

半輪皎月忽成冰只今夏月已如此若到秋高可自生
玉兔素娥兼老子三家一樣雪鬢髻

誠齋步月

先生散髮步庭中孤月行天露滿空已似廣寒宮裏去
如何別覓廣寒宮

桂樹何曾不長枝月明却有不圓時若教桂樹只管長
撈折月輪誰補伊

止酒

止酒先立約庶幾守得堅自約復自守事亦未必然約
語未出口意已慘不懽平生死愛酒愛酒寧棄官憶昔
少年日與酒為忘年醉則卧香草落花為繡毡覺來月
已上復飲落花前衷腸不禁酒此事今莫論因酒屢作
病自索非關天朝來復告痛飲藥痛不痊銳欲絕伯雅
已書絕交篇如何酒未絕告至愁已先我與意為仇意
慘我不歡何如且快意伯雅再遣前來日若再病旋旋
商量看

跋蕭彥毓梅坡詩集

西昌有客學南昌衣鉢真傳快閣旁坡底詩人梅底醉
花為句子蒞為章想渠踏月枝枝瘦贈我盈編字字香
若畫江西舊宗派不愁禽賊不禽王

入郡城泊文家宅子夜熱不寐

毒熱通宵不得眠起來弄水繞庭前火星跳去聲下銀盆
底翻動琉璃一鏡天

六月將晦夜出凝歸門

暑裏街頭可久停
今宵無月也宵征
一天星點明歸路
十里荷香送出城
山轎聲聲柔艣緊
葛衣眼眼埜風清
五更月出還家下
不早期作伴行

荷池小立

點鐵成金未是靈
若教無鐵也難行
阿誰得似青荷葉
解化清泉作水精

幽居感興

葛製冰餐消幾錢
雲栖水宿本臞仙
回頭背汗渾如雨

賺却閒身四十年

觀魚

老夫不奈熱跣足坐瓦鼓臨池觀游魚
定眼再三數魚兒殊畏人欲度不敢度
一魚試前行似報無他故衆魚初欲隨
幡然竟回去時時傳一杯忽忽日將暮

秋涼晚酌

寄老山林度懶殘
新秋又是一年
年青編翠竹風窓月
白酒紅蕖水檻天
暑欲謝時偏更毒
儂當醉後怒渠顛

古稀尚隔來年在且醕今宵藥玉船

荷池觀魚

截山剡沼貯泉流旋種鯨魚絕善游細數未齊還已亂
羣嬉半沒忽全浮荷錢符帶來復去雪片銀花稀却稠
我樂自知魚似我何緣惠子會莊周

同子文材翁子直蕭巨濟中元夜東園望月
雜碎輕雲白錦鱗十分圓月濕銀盆錦鱗散盡銀盆在
依舊青天無點痕

月到東園分外光
行行坐坐間傳觴
生愁踏碎千花影
回顧千花總不妨

十六日夜再同子文巨濟叔祭南溪步月

際晚溪游暮欲歸
追涼逐勝却成遲
月如醉眼生紅暈
山作愁眉帶淡姿
天下無人閒似我
秋邊有句說知誰
弟兄一再更相送
行到更深笑不知

重九前四日晝睡獨覺

睡思初酣過午強
起來四顧已斜陽
添糊窓榻無風氣

旋晒衣裘有日香
舊雨不來從草綠
新豐獨酌又花黃
去年重九窮忙過
可遣今年更作忙

重九後二日同徐克章登萬花川谷月下傳觴

老夫渴急月更急
酒落盃中月先入
領取青天併入來
和月和天都蘸濕
天既愛酒自古傳
月不解飲真浪言
舉盃將月一口吞
舉頭見月猶在天
老夫大笑問客道
月是一團還兩團
酒入詩腸風火發
月入詩腸冰雪潑

一杯未盡詩已成
誦詩向天天亦驚
馬知萬古一骸骨
酌酒更吞一團月

寄題劉巨卿六詠

詣齋

紫鸞自超詣
一日可天地
兒郎少讀書
聖處底難至

蒙齋

是心如維斗
萬物所取正
蒙之以微雲
孤光更淵靚

西隱

山林與朝市隱處俱未是只箇西枝西默坐且求志

拙庵

天下無箇事巧著

勅畧切

事便生濂溪一賦在座右不須

銘

壺天

其大彌九蒼其小貯一壺靜觀性中天大小竟何如

來薰軒

薰風自南來萬象皆披襟老子本不熱看他度青林

題玄潭觀雪浪閣

贛江西來千里許，流到閣前虎鬚怒。
旌陽橫劍居上頭，却喝長江教倒流。
跳出游花雪山立，濺得琳房滿山濕。
即今水落未足觀，桃花浪起君來看。
一波打窓君膽寒，贈寫真劉敏叔秀才。

冰鑑傳神苦未工，傳來恰恰五秋風。
又將老醜形骸子，傳入劉家畫苑中。

江右傳神下筆親，杉溪集裏識劉君。
君今有子能傳業，

撞過煙樓更入神

跋寫真劉敏叔八君子圖

寫趙韓王韓魏公文潞公司馬溫公王荊公六
一先生東坡先生山谷先生小像手軸

一代一兩人國已九鼎重如何八君子一日集吾宋古
人三不朽諸老一一中久別忽相逢相對恍如夢

詩人王季廉挽詩

手探盧溪頷下珠詞林再嘯老於菟不餐煙火惟存骨

吟殺江山失却鬚錦里鶯花餘故宅灞橋風雪入新圖
只今醉卧長松下猶要熊兒捉轡無

乙卯春日三三徑行散有感

東園一日走千巡又見飛龍第一春桃李成陰儂已老
江山依舊歲還新穿花踏影渾無日隔徑聞聲不見人
學省同寮各星散白雲山裏伴閒身

立春檢校牡丹

牡丹又欲試春粧忙得閒人也作忙新舊年頭將替換

去留花眼費商量東風從我袖中出小蕾已含天上香
只道開時恐腸斷未開先自斷人腸

曉起探梅

一生劫劫只長塗投老山林始定居夢破青燈窓欲白
猶疑雪店聽雞初

打併人間名利心萬山佳處一溪深仙家恐餓禪家苦
老子梅間政醉吟

江梅小樹打頭開便有紅梅趲腳來趲得杏紅開火急

春風已落第三回

題曾無媿月窓

阿兄作

音佐

雲巢阿弟作月窓乾坤清氣只雲月一家兩

手併取將作巢不用木只架雲為屋作窓不用櫺只掇
月為庭兜羅綿上住予兄銀色畛中著吾弟阿兄雲向
筆下生阿弟月向詩中明第兄雲月兩清絕雲月何曾
有分別不知雲月入胸中為復胸中有雲月

人日從歸自郡城

倦來睡思酒般濃
曉起東園看曉風
孤負梅花三四日
新年人事到城中

久雨小霽東園行散

雨寒兩月勒春遲
初喜雲間漏霽暉
道是攀花無雨點
忽然放手濺人衣

中和節日步東園

兩晨又不到東園
沙徑朝來合小乾
可惜紅梅將落去
怕風怕雨不來看

五出桃花千葉緋團欒遶樹鬪芳菲攀來欲折還休去
看到殘紅散自飛

一年佳節又中和兩分春光一已過莫恨峭寒花較晚
留連春色儘從他

誠齋集卷三十六